

## Служба Преподобной Матери нашей Екатерине, Игуменни Леснинской

### На Велицей Вечерни.

Стихиры на Господи Возвах на 8: глас 1-й, подобен «О дивное чудо»:

Дивны Твоя тайны, Богородице, / образ бо Твой чудесно явила еси, / в лесах и дубрах холмских, / иночествующих девиц призвала еси, / во главе со святой Екатериной, / обитель им создала еси, / возопием вернии, / Леснинский Твой образ прославляем вси: / Благодатная, радуйся! / с Тобою Господь! / подаяй мируи / Тобою велию милость.

О дивное чудо! / обитель сия Леснинская процвела есть, / покровом Твоим хранимая, / мудрой Екатериной водимая, / сирот и нищих утешая, / болящим лечение подавая, / благочестие в крае том утверждая, / темже Леснинский Твой образ прославляем вси: / Благодатная, радуйся! / с Тобою Господь! / подаяй мируи / Тобою велию миолсть.

Глас 6-й, подобен «Всю Отложивше»:

Вся отложивше житейския попечения, /и мирскую суету презревше, / преподобная мати Екатерино, / в леснинской веси вселилася еси, / Христу Господу во смирении и кротости послужила еси, / и многих ко спасению наставила еси, / обитель дивную создав, / сего ради от Господа прославляема, / Егоже моли спастися душам нашим.

Преподобная мати Екатерино, / с любовию ублажаем тя, / иночества наставницу, / воздержания учительницу, / православия ревнительницу, / нищих и сирот питательницу, /о юных попечение имея, / милосердствуя о недугующих, / и

леснинскую пустыню яко град соделала еси, / день и ночь молилася еси Господеви, / Егоже моли спастися душам нашим.

Кронштадтского пастыря соподвижница / в деле духовнаго возрождения, / утверждала еси народ в Православии, / богомудрыми словами и писаньми, / послужила еси Церкви Русской, / истинную веру проповедуя, / и евангельским деланием ея воплощая, / темже венцем нетленным венча тя Христос, / Егоже моли спастися душам нашим.

Глас 5-й, подобен «Радуйся»:

Радуйтесь, веси холмския, /древле явлением Леснинскаго образа прославленная, / и подвигами преподобных Екатерины просвещенная, / в Православии утвердилися есте, / и обитель дивная в Лесне процвела есть, /в нейже Царские Мученицы молилися суть, / иноческими подвигами и служением ближнему поучаяся, / к своему страсотерпческому подвигу уготавлиаяся, / и ныне с ними преподобная Екатерина / предстояще у престола Всевышняго, /да испросят нам велия милости.

Радуйся, Церковь Сербская, / Леснинскую обитель приютившая, / и богомудрым наставлениям преподобной Екатерины внимавшая, / множеством обителей женских процвела еси. / Воспойте достохвальную нашу наставницу, / поучитесь от нея иноческому деланию, / монаси бо свет миру суть, / и заступницы пред престолом Всевышняго, / да подаст Он нам велию милость.

Радуйся, страно Гальская, / и приморския дебри нормандския! / В древляя времена сия пустыня яко град процвела еси, / множеством обителей иноческих, /и подвигами их великими. / Ныне отцев сих молитвами / свет Православия в краю сем паки возсиял еси, / и ученицы

преподобныя матери Екатерины / наставления ея в сердцах своих сохраняют, / прося у Христа Спаса / да подаст нам велию милость.

Слава, глас 6-й:

Заповеди Господни возлюбивши от юности твоя, и заветы древних отцев духоносных возродивши, преподобная мати Екатерино, многим была еси наставницей монашеского жития, многих ко Христу привела еси, ибо обитель твоя яко велия лавра возсия, светом Христовым весь край той просвещая. Но и в годину брани, во изгнании, сестры заветы твоя хранили суть, гонения и скитания претерпевая, молитвами твоими храними. И ныне в сонме святых жен радостно ликующи, пред престолом Всевышняго предстоя, поминай нас, с любовию празднующих святую память твою.

и ныне, богородичен догматик, глас 6-й: Кто тебе не ублажит:

### **Вход. Прокимен дне, и чтения 3**

Премудрости Соломони чтение.

Праведных души в руце Божией, и не прикоснется их мука. Непщевани быша во очесех безумных умрети, ивменися озлобление исход их, и еже от нас шествие, сокрушение: они же суть в мире. Ибо пред лицом человеческим аще и муку примут, упование их безсмертия исполнено, и в мале наказани бывше, великими благодетельствовани будут: яко Бог искуси я, и обрете их достойны Себе. Яко злато в горниле искуси их, ияковсеплодие жертвенное прият я. И во время посещения их возсияют, и яко искры по стеблию потекут. Судят языком, и обладают людьми, и воцарится Господь в них во веки. Надеющиеся нань разумеют истину, и вернии в любви пребудут ему: яко Благодать и милость в преподобных его, и посещение во избранных его.

Премудрости Соломони чтение.

Праведницы во веки живут, и в Господе мзда их, и попечение их у вышняго. Сего ради примут царствие благолепия, и венец доброты от руки Господни: зане десницею покрывает я, и мышцею защитит их. Приимет всеоружие рвение свое, и вооружит тварь в мест врагом. Облечется в броня правды, ивозложит шлем, суд нелицемерен: приимет щит непобедимый, преподобие: поострит же напрасный гнев во оружие: споборет же с ним мир на безумныя: пойдут праволучныя стрелы молниины, и яко от благокругла лука облаков на намерение полетят: и от каменометныя ярости, исполнь падут грады: вознегодует на них вода морская, реки же потопят я нагло. Сопротив станет им дух силы, и яко вихор развеет их: и опустошит всюземдю беззаконие, и злодейство превратит престолы сильных. Слышите убо, царие, и разумеите: навыкните, судии концов земли. Внушите, держащии множества игордящиися о народех язык: яко дана есть отГоспода держава вам, и сила от вышняго.

Притчей чтение. глава ла.

Сыне, отверзай уста твоя Слову Божию, и суди вся здраво, Отверзай уста твоя, и суди праведно, разсуждай же убога и немощна. Жену доблю кто обящует, дражайши есть камения многоценнаго таковая. Дерзает на ню сердце мужа ея: таковая добрых корысте не лишится. Делает бо мужу своему благая во все житие. Обретши волну и лен, сотвори благопотребное рукама своима. Бысть яуо корабль куплю деющий, издалеча собирает себе богатство. И востает из нощи, и даде брашна дому, и дела рабыням. Узревши село купи: от плодов же рук своих насади стяжание. Препоясавши крепко чресла своя, утвердит мышцы своя на дело. И вкуси, яко добро есть делати, и не угасает светильник ея всю ночь. Лакти своя простирает на полезная, руце же свои утверждает на вретено. И руце свои отверзает убогому, длань же простре нищу. Не печется о сущих в дому муж ея, егда где замедлит: вси бо у нея одеяни суть. Сугуба одеяния сотвори мужу

своему, от виссона же и порфиры себе одеяния. Славен бывает во вратах муж ея, внегда аще сядет в сонмищи со старейшины жителями земли. Плащаницы сотвори, и продаде финикианом, опоясания же хананеом. Уста своя отверзе внимательно и законно, и чин заповеда языку своему. Крепостию и лепотою облечеса, и возвеселися во дни последния. Тесны стези дому ея: брашна же леностнаго не яде. Уста своя отверзе мудро и законно: Милостыня же ея возстави чада ея, и обогатишася: имуж ея похвали ю. Многи дщери стяжаша богатство, многи сотвориша силу: ты же предупела и превознеслася над всеми. Ложнаго угождения, и суетныя доброты женския несть в тебе: жена Бо разумная Благословена есть. Страх же Господень сия да хвалит.

на литии стихиры, глас 2-й:

Учением преподобнаго Амвросия Оптинскаго наставляема, правило его сестрам преподала еси, о молитвенном делании ревнуя, таже в подвиги различныя вдавшеса усердно, мудрость духовную стяжала еси, дщерей духовных во множестве приобрела еси, ихже к царствию небесному, вечному духовно руководила еси.

Яко Кронштадтский пастырь возлюбила еси душу ближняго твоего, струпы нищеты обязуя, сироты и убогия пригревая, отверстым сердцем сострастия исполнена, желая во еже ко Господу привести я. Святой Иоанн обитель твою благослови, и до ныне с тобою о ней печется. Уврачуйте и душ наших страсти, и советом наставите нас, богоугоднии предстатели наши.

слава, глас тойже:

Преподобная мати Екатерино, с любовию ублажаем тя, православия ревнительницу, воздержания и трезвения учительницу, собеседницу нищих и сирот питательницу, юже венча Христос венцем небесным, Егоже моли спастися душам нашим.

и ныне, глас тойже: Непроходимая врата:

На стиховне стихиры, глас 1-й, подобен: "Небесных чинов"

Яко жены мироносицы древле стопам Христовым последовала еси, благую весть миру возвещая, и подвиги милосердия творя, Екатерино, мати премудрая, моли Христа Бога, да и мы подражатели тебе будем, Христову истину проповедуя.

стих: Дивен Бог во святых Своих, Бог Израилев.

Служению диаконисс древних времен поревновала еси, возродить сей чин желая, яко первомученица диаконисса Фекла учению святаго апостола Павла внимая, и ныне нас, чад твоих настави, да ничтоже разлучит ны от любви Божия.

стих: Честна пред Господем смерть преподобных Его.

Коварством безбожных обители и страны родныя лишилася еси, в державе сербстей приют обретши, обитель преподобныя Ангелины наследуя, дух иночества древняго в разоренном крае возжигая, дщери сербския приобрела еси, такоже сердца наша обнови, да крест монашества достойно до конца понесем.

слава, глас 3-й

О мати премудрая, Екатерино блаженная! Диакониссам древния Церкви последуя, подвиги милосердия и просвещения христианскаго сквозь все житие твое являла еси, яко вторая Макрина сестер собирая, подобно Олимпиаде святей нищим служба, любомудрию преподобныя Павлы подражая, днесь с ними в сонме святых жен Христа прославляеши, не забуди нас чад твоих, и обитель твою до конца сохрани.

и ныне, глас тойже:

О Премилосердая Мати Владычице! Во образе твоём Леснинском чудесно среди нас пребываеши, не остави нас убогих и немощных, едина истинная христиан покровительнице, всяких лютых обстояний, бед и скорбей нас избави, и молитвами твоими сохрани.

#### **Тропарь, глас 5-й:**

**Кронштадтскаго пастыря собеседница, / Амвросием Оптинским наставляемая, / множество дев ко иночеству под покров Пречистыя привела еси, / сиротам и немощным послужила еси, / ныне в небесных обителях ликуеши / не престай о нас молитися, / преподобная мати Екатерино, / да сохранится обитель твоя Леснинская, / и о спасении душ наших.**

и ныне, богородичен, глас тойже,  
**На Утрени**

На Бог Господь: тропарь преподобной, дважды. Слава и Ныне, богородичен,

По 1-й кафизме седален, глас 1-й:

Праведнаго Иоанна Кронштадтскаго наставлениям внимая, дивную обитель Божия Матери воздвигла еси, сонм инокинь собрав, и якоже он о сиротах и неимущих тамо пекийся. Помяни и нас, убогих чад твоих, да не отринит Господь от Царствия Небеснаго.

слава, и ныне, богородичен, глас тойже:

Притецем к тихому пристанищу и заступнице рода нашего Деве Марии, поклонимся честному ея образу, умильно зовуще: призри, благосердая мати, на лютыя скорби нас обдержажыя. и исцели болезни душ наших.

По 2-й кафизме седален глас 2-й:

Амвросий Оптинский на подвиг тя, о Екатерино, благослови, и мантией своею покры, тем новую обитель породил и духом отцев Оптины: непрестанной молитвой и духовным трезвением, укрепи.

слава, и ныне, богородичен, глас тойже:

Устами и сердцем присно величаем Тя, о Богомати: Ты же, рождшая Бога, подай утешение рабом твоим и не отрини нас от Твоего заступления.

#### **Полиелей и величание:**

Ублажаем Тя, преподобная мати Екатерино, и чтим святую память твою, ты бо молиши за нас, Христа Бога нашего.

псалом избранный: Терпя потерпех Господа:

седален по полиелею, глас 6-й:

Приидите, вси святители и священницы, иноци и инокини, мирстии же мужии и жены благочестивыя, богатии и убозии, хотящия спастися: поревнуем блаженней и преподобней матери Екатерине, яже молитвою и милосердием, мудростью и смирением, душу свою просвети, и ныне пребывает в невечернем свете со ангельскими чинми, радующися и веселящися, и молит о всех людях, во еже спастися душам нашим.

слава, и ныне, богородичен, глас тойже:

Никтоже притекаяй к тебе посрамлен от тебе исходит, Пречистая Богородице Дево: но просит благодати, и приимлет

дарование к полезному прошению.

Прокимен, глас 4-й: Дивен Бог во святых Своих, Бог Израилев. стих: В церквах благословите Бога, Господа от источник израилевых. Всякое дыхание:

Евангелие от Матфея, зачало рд.

по 50-м псалме стихира, глас 6-й, подобен Всю отложивши:

Преподобная мати Екатерино, / с любовию ублажаем  
тя, / иночества наставницу, / воздержания учительницу, /  
православия ревнительницу, / нищих и сирот питательницу, / о  
юных попечение имея, / милосердствуя о недугующих, / и  
леснинскую пустынь яко град соделала еси, / день и ночь  
молилася еси Господеви, / Егоже моли спастися душам нашим.

**Канон**, Глас 8-й. Егоже краегранесие: **О мати Екатерино, сестер  
своих сохрани.**

Песнь 1.

Крест начертав Моисей, впрямо жезлом Черное пресече,  
Израилю пешеходящу, тоже обрато фараоновым колесницам  
ударив совокупи, вопреки написав непобедимое оружие: тем Христу  
поим, Богу нашему, яко прославися.

**О**т юности Христа возлюбив, из благочестиваго бо  
корене произрасла еси, о мати Екатерино, и сладчайшее имя  
Иисусово в сердце твоём присно нося, укрепляема  
божественною благодатию, великия подвиги и труды подъяла  
еси.

**М**ирскую прелесть, богатство и славу житейскую  
презрела еси, направляема Спасителя, всемудрая,  
божественными повелении, и Того любовию палима, потекла  
еси к подвигам тщиася, вся ухищрения вражия словом и  
писаньми, мудростию и благодатию, низложила еси.

**А**постольское служение понесла еси, о Екатерино,  
ангельский образ прияв и православие в иноверном крае  
словом, делом и писаньми проповедуя, и ныне нас в Истине  
укрепи,

**Т**обою, Пречистая Владычице, от всех родов  
предизбранная Дево, весь мир обновися, и весь род  
человеческий от лести диавольския свободися, и вопиет ко  
Христу, яко прославися.

Песнь 3.

Жезл во образ тайны приемлется, прозябением бо  
предразсуждает священника, неплодящей же прежде церкви, ныне  
процвете древо Креста, в державу и утверждение.

**И**ноческую обитель деятельнаго монашества по  
благословию оптинскаго отца Амвросия основала еси, его  
же ученьми смиренным сердцем молитву творити сестры твоя  
научи.

**Е**гда праведный Иоанн Кронштадтский обитель твою  
посети, лаврой велией Лесну нарече, и улием пчелинным,  
пророчески провидя, да множество обителей из нея  
произойдут.

**К**рест игуменский сам Царь Мученик на тя возложи,  
мати Екатерино, любовь твою к народу своему зря, училища и  
лечебницы леснинския укрепляя, апостольское твое служение  
во славу православия утвердив.

**А**нгельских чинов радование, на земли человек  
крепкое предстательство, Пречистая Дево, спаси ны, иже к  
твоему образу притекающия.

седален, глас 4:

Леснинскую обитель и пристанище сирот и отроковиц  
посетивши, идеже множество девиц покров в дому Пречистыя

обретше, Царица Мученица Александра умилися зело, и ублажая труды твоя, о мати Екатерино чадолубивая, святой иконой тя благослови.

слава, и ныне, богородичен, глас тойже:

Тя стену стяжахом, Богородице Пречистая, и Благоутишное пристанище, и утверждение. Темже молюся иже в житии обуреваем: окорми и спаси мя.

#### Песнь 4.

Услышах, Господи, смотрения Твоего таинство, разумех дела Твоя, и прославих Твое Божество.

Труды книжныя от юности понесла еси, покровительнице своей преподобной Евгении в искании правды Божиия подражая, и яко оная богатство и славу княжескую, временную, нивчтоже вменила еси, уневестилася еси жениху Христу.

Екатерине мученице велией в любомудрии уподобилася еси, имя ея во ангельском образе восприяв, и пламенную любовь ея ко Христу чрез все житие твое в сердце своем возжигала еси.

Ревнуя о подвигах диаконисс древних времен, яко Фива и Фекла, Макрина и Павла, Ксения и Олимпиада, Телу Христову, Церкви Святой, делом и словом, писаньми и поученьми послужила еси.

Избави нас от всяких бед и напастей, Владычице, яко инокинь Леснинских Твоим омофором присно покрывающи.

#### Песнь 5.

О Треблаженное Древо, на немже распяся Христос, Царь и Господь. Имже паде древом прельстивый, тобою прельстився, Богу пригвоздившуся плотию, подающему мир душам нашим.

Недужныя упокоевая, сироты утешая, юные сердца

просвещая, воистину яко евангельския мудрыя девы сосуд свой елеем восполнила еси, и ныне в чертозе Жениха Небеснаго, Христа Спасителя твоего водворяешися.

О чудо велие! Яко в мгновение ока обитель твоя процвете! Множество черноризец ты под покровом Пречистыя собрала еси, многим наставницей монашескаго жития была еси.

Службу церковную и молитвенное делание не оставляя, таже в послушания различная вдавшася усердно, о Екатерино, но и писании духовныя не оставляла еси, тайны жития иноческаго и просвещение христианское испишуя.

Еже радуйся к тебе зовем со ангелом, Богоневесто, пред образом твоим Леснинским припадая, неседальную песнь тебе ежедневно воспевая, ибо вемы, яко обрящем тобою спасение.

#### Песнь 6.

Воднаго зверя во утробе, длани Иона крестовидно распростер, спасительную страсть проображаше яве. Тем тридневен изшед, премирное воскресение прописаше, плотию пригвожденнаго Христа Бога, и тридневным воскресением мир просвещашаго.

Слава обители твоя Леснинския по всей державе российстей прогреме, и труды твоя плоды многия принесе: в странах польской и белой руси, румынской и сербской сестры твоя иноческия общежития основаша.

Твою обитель царские страсотерпцы посещая, утешение велие сестрам и сиротам устроив, твои подвиги и труды ублажая. И ныне с ними на небесах ликуеши, идеже молите о чтущих благочестно память вашу.

Егда военная гроза к обители твоей приблизися, в Петров град удалилася еси, идеже служители и сестры твоя гонение от безбожных прияша, и мученические венцы венчашася.

Радуйся, славо православных Всечестная, радуйся всех упование. Тобою бо от клятвы свободихомся. Но яко имущи

дерзновение ко благопременному Сыну твоему и Богу,  
матерней твоей молитвою не оскудей молиться, Пречистая.

#### Кондак глас 8.

Истину Христову от юности возлюбила еси, и заповеди Спасителя в сердце своем сложила еси, просвещая юнныя души и недугующим и нищим служа. Под покровом Пречистыя обитель иночествующих собрала еси, святоотеческия уставы и дух монашества первых веков тамо восстанавливая, словом и делом и писаньми нас присно наставляя. Темже мы чада твоя с любовью зовем ти: Радуйся, О Мати Екатерино, Леснинския обители славо и похвало.

#### икос

Востаните, инокини Леснинския и Хоповския, ангелоподобное житие матери нашея Екатерины узревшия, да восхвалим подвиги и труды ея, присовокупитесь сестры обителей Варшавы, Ялты и Петрова града, Вирова и Теолина, Радочницы и Турковиц, от Леснинской лавры возведенныя, воспойте с ними велие множество инокинь сербской страны, ею к монашескому житию приведенныя, услышите и наш немощный глас, сестер последних дней, в Фурке и Провемоне, в разсеянии и катакомбах России и в скиту Предтечи под горой Микуль крупницами от духовной трапезы той утешенныя, и воспевая предстательницу нашу весь сонм наш согласно воззовет:

Радуйся евангельского милосердия подвижнице,  
Радуйся, мирносиц служения явившая,  
Радуйся, яко преподобная Евгения мир оставившая,  
Радуйся, любомудрию святой великомученицы Екатерины подражая,  
Радуйся, Кронштадтскаго Пастыря собеседница,  
Радуйся, Оптинского Амвросия чадо духовное,  
Радуйся, Царя Мученика в служении народу русскому

сотаиннице,  
Радуйся, Преподобномученице Великой Княгине Елисавете подражавшая,  
Радуйся, Преподобныя Ангелины сербстей обитель приемшая,  
Радуйся, Первомученику Стефану в диаконском служении следовавшая,  
Радуйся, Целителю Пантелеимону в лекарском деле сослужившая,  
Радуйся, со всеми новомучениками российскими ныне на небесех торжествуя,  
Радуйся, О Мати Екатерино, Леснинския обители славо и похвало.

#### Песнь 7.

Безумное веление мучителя злочестиваго люди поколеба, дышущее прещение и злохуление богомерзское: обаче три отроки не устраши ярость зверская, ни огонь снедаяй, но противодышущу росоносному духу, со огнем суще пояху: препетый отцев и нас Боже, благословен еси.

Странствия твоя в молдавский край тя приведе, Жабкинскую обитель тебе святитель Анастасий вручи, идеже образ Пречистыя и сестер твоих от безбожных укры и монашеское житие возроди.

Верность святоотеческому православию храня, в Сербскую страну переселилася еси, в княжеской обители Хопово яко в Лесне велия подвиги милосердия во услужение сиротам и сродникам твоим разсеянным творила еси

О Екатерино монахолюбивая! По всей стране сербской обители черноризец насади, мнозех ко спасению наставила еси, сего ради святую твою память светло празднуем.

Имуще икону твою святую яко неистощимый источник милости и исцелений, молим тя, Предстательницу нашу, не остави до конца погибнути рабом твоим, но ускори изяти нас от всякия беды и печали.

## Песнь 8.

Благословите отроцы, Троицы равночисленнии, Содетеля Отца Бога, пойте снизшедшее слово, и огонь в росу претворшее, и превозносите всем жизнь подавающего, Духа Всесвятаго, во веки.

**Х**оповская обитель путь Лесны повтори, в стране новой рассадником монашества быв, и прибежищем сирот и страждущих. Сия земля и мощи твоя сохрани, да прославит тя Господь со всеми святыми.

**С**естры твоя всех времен и со всех концев стекошася, да прославим память твою, со ангелы и сподвижниками твоими на небесех совокупно торжествуя. Сего ради помяни нас, чтущих святую память твою.

**О** мати Екатерино богомудрая, красото и похваление монашескаго чина, невесто Христова избранная, со ангелы и всеми святыми в Царствии Божиим водворившаяся: молися спастися обители твоей и всем православным христианам!

**Х**рам живой и освященный сущи, Пренепорочная, Пребезначальное бо Слово плотию родила еси, помози да и мы храмы Духа Святаго сподобимся быти.

## Песнь 9.

Таин еси, Богородице, рай, невозделанно возрадивший Христа, Имже крестное живоносное на земли насадися древо. Тем ныне возносиму, поклоняющесе Ему, Тя величаем.

**Р**адуйся, о Екатерино блаженная, в Небесном Иерусалиме, егоже сподобилася еси узрети при кончине твоей, ныне водворяяся, присно моли Христа Бога, да и нас сподобит жителями его быти.

**А**нгелоподобное житие твое Христос прослави, по многих летех нетление мощей твоих яви. Еяже молитвами Христос во благочестии нас да утвердит и чада непоколебимыя Церкви Своея нас явит.

**Н**ебесныя обители унаследовала еси, о мати Екатерино богомудрая, идеже со всеми святыми женами ныне ликуеши,

но молим тя, земную обитель твою не забуди, и услыши дщери твоя, верою и любовью тя призывающия.

**И**мущи тя, Богородице, упование и предстательство, вражиих навет под покровом твоим не убоимся, яко спасаеши души наша.

## Светилен

Светом Христова учения мнози просвещая, О Екатерино, отошла еси ко Трисиянному великому Свету, и ныне пребываеши в неизреченной светлости со всеми святыми. Тем тя просим: молися о нас, творящих святую память твою.

слава, и ныне: богородичен:

Молебницу Ти приводим и теплую заступницу, Пречистую Матерь Твою вернии по долгу: сподоби рабы Твоя причаститися славы Твоея, Христе, и праведных наследия, и пищи райския, и даждь Царство небесное.

Стихири на Хвалите на 4, глас 6-ый, подобен : "Тридневен"

Како возможем не дивитися тебе, Блаженная мати Екатерино, пребыла еси, аки свеща светящи, посреде суетнаго мира, богомудрыми твореньми твоими, духовный путь обители нашея утверждая.

Ублажаем память твою, наставнице и молитвенице наша, и ныне нас, чад твоих укрепи, в православии и трезвении души, да заветы твоя сохраним, до скончания века.

Радуйся, о мати! Светильник свой елеем восполнив, о людех милосердствующи, житию во Христе наставляя, днесь со мудрыми девами в чертозе небесном ликующи.

Слава, Глас 8:

Преподобная мати Екатерино, житие твое на земли богоугодно совершила еси, темже Христос Бог наш нетлением мощи твоя прослави. Приидите, инокинь собори, пеньми и песнями духовными светло ликовствуем, сице зовуще: радуйся апостольских и отеческих преданий ревнительнице: радуйся Леснинския обители славо и похвало, радуйся, Екатерино всечестная: просияла бо дела благими, и многих ко Христу привела еси, и ныне Господу предстоящи, моли Его даровати нам велию милость.

и ныне, глас тойже:

Дивно явила еси, О Владычице Богородице, Твой образ Леснинский, на окраине державы Российския, среди народа темнаго и беднаго. Преподобную Екатерину на место то призвала еси, да обитель милосердия и просвещения учредит. В странствиях обитель сию честным Твоим омофором покрывала еси, и до ныне ю сохраняючи, в скитаниях сопутствуя, в истине укрепляя, и в скорбех утешая. Пребуди с нами и во веки, О Всепетая Мати, от наветов вражиих и козней диавольских ограждая, яко стено нерушимая.

#### **На Литургии.**

Блаженны от канона, песни 3-я и 6-я.

Прокимен, глас 4-ы: Дивен Бог во святых Своих, Бог Израилев.

стих: В церквах благословите Бога, Господа от источник израиелевых.

Апостол к Галатам, зачало си.

Евангелие от Матфея, зачало рд.

Причастен: В память вечную будет праведник:

#### **Молитва.**

О преподобная и богомудрая Мати Екатерино, Церкви Православной похвало и украшение, монашествующих славо и утверждение! Пресвятою Владичецею Богородицею призванная и под покровом

Святыя Ея Иконы мир обретшая, праведным Иоанном Кронштадтским в служении ближниму руководимая, и преподобным Амвросием Оптинским молитвенному деланию наставляемая, дивную обитель иноческую и велий дом милосердия воздвигла еси. Собеседницей Царских Срастотерпцев явшаяся, молитвами и милостынею их обитель твоя яко лавра процвете, множество скитов и обителей новых породы. Службу церковную и иноческое делание не оставляя, ты множество писаний и творений испишуя, о служении женstem в Церкви Святой и о восстановлении чина древних диаконисс ревнуя. Гроза военная и гонение от безбожных обитель твою раздели: овии служителие и черноризицы страдания и мученические венцы прияша, овии труды и скорби изгнания познаша. Святоотеческие заветы храня, в сербстей державе обрела еси покой, обитель преподобной Ангелины в Хопово возрождая и иноческое делание в стране сей насаждая. Горний Иерусалим при кончине твоей праведней узревшая, тамо водворилася еси, и ныне со святыми наставниками твоими ликуеши и со сродницами твоими, новомучениками российскими, Царя Христа прославляеши. Смиренно припадающе пред образом твоим святым, молимся прилежно: О Богоносная Мати! Не забуди обитель твою, огради ю миром и от враг видимых и невидимых защити, сестры твоя в иноческих подвигах укрепил, в трудах и скорбех утешил. Ей, госпоже, всечестная мати, преподобная Екатерино! помози нам молитвами твоими: огради нас и заступи от всяких козней вражиих, в правой вере укрепил, время на покаяние нам испроси, да невозбранно от земли на небо преидем и спасение уллучим, молитвами твоими у Христа Господа, Егоже и сподобимся пети и славословити, со безначальным Отцем и Святым Духом во веки веков.

АМИНЬ.